

## DOMINGU IV TEMPU ADVENTU – TINAN C

### Tema Domingo dahaat Tempu Adventu nian

Iha tempu ikus nian molok Natál, mensajen fundamentál Maromak nia Liafuan nian ko'alia kona-ba misaun fundamentál Jezús nian: propoin projetu ida salvasaun no libertasaun nian ne'ebé lori ema sira atu deskobre ksolok loos.

*Evanjellu* sujere katak Maromak nia projetu ne'e iha oin ida: Jezús Nazaré mai hasoru ema sira atu apresenta ba sira ne'ebé ida dadur no nakukun laran proposta ida moris no liberdade nian. Ni apropoin mundu foun ida, iha ne'ebé ema marjinalizadu no primidu sira hetan fatin no sira ne'ebé terus hetan dignidade no ksolok. Ida-ne'e mak anúnsiu ida ksolok no salvasaun nian, ne'ebé halo haksolok ema hotu ne'ebé rekoñese iha Jezús proposta libertadora ne'ebé Maromak halo ba nia. Pproposta ne'e. Dala barak to'o mai liuhusi limute no frajilidade “instrumentu” umanu Maromak nian; maibé nafatin proposta ida ne'ebé soi Maromak nia marka no kbiit.

*Leitur dahuluk* sujere katak mundu foun ne'ebé Jezús, Davis nia beioan, mai atu propoin mak don ida husi Maromak nia domin. Naran Jesus mak “Dame”. Nia mai apresenta proposta ida kona-ba “reinu” ida dame no domin nian. Ne'ebé la hari'i ho ksiit kilat nian, maibé hari'i no hetan simun iha ema sira nia fuan.

*Leitura daruak* sujere katak misaun libertadora Jezús hakarak harii mal estabesimentu relasaun komuñau no prosimidade nian entre Maromak no ema sira. Nune'e ema sira presiza simu proposta ne'e ho disponibilidade no obediénsia – tuir Jezús Kristu nia ilas – ho “sin” totál ba Maromak nia projetu.

### LEITURA I – Miq 5,1-4a

Profeta Miqueias moris no hala'o ninia ministériu iha Judá, iha séckulu VIII/VII mK. Livru Miqueias nian hahú atu haktuir (kap. 1-3) salan boot sira Israel no Judá nian, hodi subliña liuliu, salan sosiál sira, apresenta sira nu'udar infidelidade boot ba kompromisu sua asume iha ámbitu “alianza” nian no denuncia “teolojia opresaun nian:.. Maski nune'e, testu ohin nian, parte livru daruak nian, ne'ebé tuir komentadór barak la mai husi Miqueias maibé husi autór anónimu ida, apresenta liafuan salvasaun nian, ne'ebé hakarak atu anima Posu nia esperansa (kap. 4-5).

### MENSAJEN

Testu ohin nian foti fali promesa mesiánika sira. Iha kuadru ida injustisa no terus nian, frustrasaun no dezánimu nian – profeta fó sai kona-ba ema ida importante ne'ebé atu mai, iha tempu futuru ne'ebé sei ukun Maromak nia Povu. Ema ne'e, ne'ebé Maromka mak haruka, sei mai husi David nia uma-kain, no nia sei ;ori fali tempu dame, justisa, moris di'ak ba Maromak nia Povu haensanuluk iha liurai David nia ukun. Frazé ikus leitura nian (“Nia sei sai Dame”) define konteúdu konkretu esperansa ne'e nian: liafuan “shalom” uza iha ne'e signifika hakmatek, la iha violénsia no konfliktu, moris naresin, iha liafuan ida, ksolok nakonu plena.

## LEITURA II – Heb 10,5-10

“Surat ba Ebreu sira” mak testu anónimu ida, karik hakerek molok tinan 70 no haruka ba comunidade sarani ida mai husi judaísmu iha ninia maioria. Komunitade ida ne’ebé karik ninia fiar hahú sai “morna” no ladún kompromete an no moris iha perigu atu desvia husi doutrina loos.

“Surat” ne’e mak apresentasaun ida kona-ba mistériu Kristu nian, hodi subliña liuliu dimensaun saserdotál ninia misaun nian: “amlulik boot aliansa foun nian”, mediasaun entre Maromak no ema sira. Hafoin autór mós reflète kona-ba kondisaun sarani mai husi misaun saserdotál Kristu nian: sarani sira, liuhusi Kristu amlulik, sira tama iha Povu saserdotál, katak comunidade sarani no tenke halo sira-nia moris nu’udar sakrifisiu kontínuu hahín nian, agradesimentu no domin nian.

Testu ne’ebé propoin mai ita tama iha parte datoluk surat nian (Heb 5,11-10,39). Iha parte ne’e, autór reflète kona-ba krakterístika orijináriu saserdósiu Kristu nian.

### *MENSAJEN*

Iha mundu Testamentu Tuan nian. Sé mak hakarak celebra komuñau ho Maromak ka hatudu ninia saran-an totál ba Maromak ka hetan perdaun ba nia salan sira, hasa’e sakrifisiu balada nian ida, ne’ebé amlulik entrega iha Jahwéh nia liman... Maski nune’e. Profeta sira afirma tiha ona dala barak kona-ba folin-laek sakrifisiu sira-ne’e nian (haree Is 1,11-13; Jr 6,20; 7,22; Os 6,6; Am 5,21-25; Miq 6,6-8), basá sira mak ritu esternu de’it, la la’o hamutuk ho atitude loos ka sinsera efuan nian husi ema ne’ebé hasa’e sakrifisiu ne’e. Hodi tau iha Jezús niaibun liafuan salmista ida nian (kf. Sl 40,7-9), autór “Surat ba Ebreu” afirma katak, iha mundu aliansa foun nian, la’ós ona sakrifisiu balada nian mak realiza komuñau ho Maromak, entrega totál fiar-na’in nian ba Maromak, perdaun ba salan sira; Jezús nia inkarnasaun, entrega totál Kristu ia moris rasik, ninia respeitu absolutu ba Aman nia projetu no hakaran mak bele halo aprosimasaun no relasaun ema nian ho Maromak. Sé mak hakarak deskobre Aman no hakbesik Nia, hateke ba Jezús; basá Jezús hanorin mai ita ho ninia obediénsia ba Aman nia projetu, oinsá loloos tenke sai relasaun filiasaun nian ho Maromak.

### EVANJELLU – Lc 1,39-47

Testu ne’ebé propoin mai ita hola parte ba “Evanjellu Infánsia nian”. Estudu atuál sira ko’alia kona-ba “Evanjellu Infánsia nian” nu’udar jéneru literáriu espesial ne’ebé la pretende sai relatu oloos kona-ba akontesimentu sira, maibé katekeze ida atu proklama realidade salvífika sira ne’ebé fiar haklaken kona-ba Jezús (Nia mak Mesias, Maromak nia Oan, Maromak ho ita). Nia forma narrasaun nian uza téknika “midrash haggádico” (téknika leitura no interpretasaun nian ida kona-ba Testamentu Tuan ne’ebé rabbi judeu sira uza iha époka Testamentu Foun nian). Jéneru literáriu ne’e hanaran “homologese” no uza tipolojia sira: ema no faktu sira Testamentu Tuan nian hetan ninia korrespondénsia ho ema no faktu sira Testamentu Foun nian. Iha nia klaran sira kahur mós elementu apokálíptiku (aparisaun, anju, mehi sira). Ne’ebé iha finalidade atu lori narrasaun ba oin no esplisita ideia teolójika no katekeze kona-ba Jezús. Ida-ne’e mak elementu kahur-malu nian ne’ebé ita bele hetan iha Evanjellu ohin nian: liu fali informasaun “jornalístika” ida kona-ba gaktu konkretu sira, ida-ne’e maka katekeze ida kona-ba Jezús, hahú husi mensajen no promesa hasai husi Testamentu Tuan.

## MENSAJEN

Referénsia dahuluk haktuir katak bainhira Maria kumprimenta Izabél, kosok-oan (Juaun Batizta) haksoit ho ksolok iha nia knotak. Evidentemente, ida ne'e indikasaun teolójika ida: ba Lucas, Jezús mak Maromak ne'ebé mai hasoru ema, no iha mensajen ida salvasaun/libertasaun nian ne'ebé konkretiza promesa sira Maromak halo ba beiala sira; nune'e Jezús nia prezensa provoka ksolok, halo ema sira ne'ebé hein konkretizasuan promesa nian, haksoit iha ksolok. Promesa nia realizasaun kona-ba mundu ida justisa nian, domin nian, dame no ksolok nian ba ema hotu realiza ho Jezús ne'ebé mai.

Hafoin ita iha Izabél ninia resposta ba Maria nia saudasaun: "Ita rahun-di'ak liu fetu hotu". Liafuan sira-ne'e mosu iha "knananuk Débora nian" (kf. Jz 5,24) atu celebra Jael, fetu ne'ebé, apezarde ninia frajilidade, sai instrumentu Maromak nian atu so'i Povu husi Sísera nia liman. Nune'e, Lucas apresenta Maria hanesan ne'e – maski iha ninia frajilidade – nia sai instrumentu Maromak nian atu konkretiza salvasaun/libertasaun ema sira-nian.

Ikusnian, ita iha Maria nia resposta: "ha'u-nia klamar hahi'i Na'i...". Maria niaresposta foti liafuan husi salmu ida agradesimentu nian (kf. Sl 34,4), uza atu agradesese Jahwéh basá proteje ema haraik-an sira no so'i sira, maski hasoru opresós sira-nia prepoténsia. Salmu ida esperansa no konfiansa nian. Ne'ebé foti sa'e Maromak nia preokupasaun ba ema kiak sira ne'ebé sai vítima injustisa no opresaun nian. Lucas sujere momoos katak, Jezús nia prezensa, liuhusi fetu simples no frajil ida-ne'e, katak Maria, mak sinál ida Maromak nia domin nian, ne'ebé preokupa atu lori libertasaun ba em ahotu ne'ebé sai vítima prepoténsia no injustisa sira nian husi ema sira. Ho Jezús, to'o mai tempu foun libertasaun nian, dame nian, ksolok nian, ne'ebé profeta sira horiulukkedas haklaken.